



aktivis lokal

evenman piblik

sipò

# Yon Veye

Yon evenman piblik pou montre sipò pou fanm ki sibi vyolans


Yon veye se yon evenman ki rasanble moun pou yo sonje yon moun oswa yon bagay. Yon veye se yon evenman ki byen tonbe pou faz “Sipò”, ki se moman pou fè fanm ki sibi vyolans, ak moun ki genyen VIH/SIDA, santi yo ka jwenn sipò nan kominote a.

Chwazi yon tèm pou veye w la (pa egzanp, yon fanm anpatikilye ki te blese oswa mouri kòm yon rezilta vyolans, tout medam yo ki te pèdi lavi yo nan vyolans oubyen VIH/SIDA, oswa fanm ki gen pwoblèm sa yo kounye a).

Yon veye se ka yon evenman ki chaje ak fòs ak emosyon pwofon, kote moun nan kominote a kapab ekspri sa ki choke yo ak tristès yo.

## Ki moun?

Ou ka chwazi envite kèk moun oubyen gwoup ou seleksyone, oswa ou ka kite tout moun ki vle nan kominote a vin ladann. Moun ou envite yo pral depann de ki kalite veye ou planifye pou w genyen.



## Ki kote?

Yon veye ka fèt nan yon kote ki nan mitan kominote a oswa, si sa pi bon pou kominote w, anpil ti veye kapab fèt nan tout kominote a an menm tan. Pa egzanp, fanm ak gason nan chak ri te kapab soti kite kay yo nan yon moman yo chwazi davans e fè yon ti silans yo tout menm lè a. Si veye a fèt nan yon sèl kote, asire w ou genyen tout pèmi ak otorizasyon ki nesèsè yo nan men otorite nan zòn nan.



## Ki lè?

Veye yo ka fèt pandan lajounen oswa aswè. Souvan, si li fèt nan aswè, patisipan yo kenbe bwa chandèl, lanp, oswa balèn pou senbolize aksyon sonje a. Asire w ou planifye dapre jan ozalantou w ye ak ki kalite sekirite sa mande. Sekirite moun se pati ki pi enpòtan nan nenpòt evenman piblik.

## Kisa?

Gen anpil fason pou òganize yon veye.

Men kèk lide:

1. Envite manm kominote a pou rasanble pou yon veye kote y ap fè yon silans total kapital, avèk sèlman yon banyè ki esplik poukisa yo rasanble an silans.
2. Mande manm kominote a pou pote balèn, oswa bay yo nan veye a. Fè patisipan yo sèvi avèk balèn pa yo pou liminen yon kote ki dedye pou memwa viktim yo.
3. Mande zanmi oubyen fanmi moun n ap sonje yo pou di kèk mo sou moun yo, oubyen sou pwoblèm nan.
4. Chante yon chante dèy anpil moun nan kominote a konnen.
5. Mande moun nan kominote a pou yo mete flè yon kote, pou montre yo sonje viktim yo.
6. Mande yon lidè lokal pou fè yon ti diskou sou pwoblèm vyolans oubyen VIH/SIDA, epi apre diskou a fè silans yon moman.
7. Kolekte epi apre sa, li non moun ki pèdi lavi yo nan vyolans oubyen VIH/SIDA.
8. Mande lidè relijye yo pou di lapriyè pou moun ki te blese oubyen ki pèdi lavi yo.

## Kouman?

Chwazi tèm veye a ansanm, epi chèche pi bon fason pou tout moun ini ansanm nan kominote a.

Ede lòt moun konprann sa yon veye ye, si se yon bagay ki nouvo pou anpil moun nan kominote a – ou kapab fè sa nan radyo, oubyen nan reyinyon kominotè.

Tabli yon komite k ap responsab pou planifye epi reyalize evenman an.

Yon **Veye** kapab ede  
manm kominote a  
rekonèt **enjistik** ki genyen  
nan **vyolans sou fanm**  
ak **VIH/SIDA**  
epi fè moun santi  
yo **vle fè kichòy**  
pou sa **chanje**.

Si w bezwen plis ransèyman sou **SASA!**, kontakte nou: Repanse Pouvwa (509) 3617 1815 • [annanpechevyolans@gmail.com](mailto:annanpechevyolans@gmail.com) •  
Beyond Borders (011) 202 686 2088 • [www.beyondborders.net](http://www.beyondborders.net)

Pou vèsyon orijinal **SASA!** ann Angle: [www.raisingvoices.org/sasa](http://www.raisingvoices.org/sasa)

Tèks sa a, se yon adaptasyon vèsyon orijinal **SASA!** Raising Voices ak ilistrasyon atis Marco Tibasima.

Se yon ekip Repanse Pouvwa/Beyond Borders avèk atis Chevelin Pierre plis grafis EducaVision ki reyalize adaptasyon an pou Ayiti.

**SASA!**

An n anpeche vyolans sou fanm ak enfeksyon VIH/SIDA